

laburrean



Jasone Irarragorri EAKo legebiltzarkidea.

XOUSE SIMAL

■ Earen baitan «partehartzea eta eztabaida urriak» direla esan du Jasone Irarragorrik

BIZKAIKO Earen zuzendaritzak datozen hauteskundeetarako hautagaien Bizkaiko zerrendaburu postutik kanpo utzi duela jakin ostean, gogor mintzatu zen atzo Jasone Irarragorri bere alderdiaren inguruan. «Uneotan partehartzea eta eztabaida urriak dira alderdiaren baitan», esan zuen Irarragorrik. Bilboko alkatetza lortzeko aukerarik gabe gelditu da EAKo kidea Sabin Intxaurre alderdikidearen mesedetan; gainera, Bizkaiko zuzendaritzak hartutako erabakia Earen zuzendaritza nazionalak ere onartu egin du. Hala ere, Earen arazoa ez dela zerrendena agertu zuen Irarragorrik, «alderdiari kontzeptu eta eztabaidari buruzkoa baizik». Bizkaitik EA alderdiak Irarragorri gabe aurkeztu duen zerrendari buruz honela esan du EAKo legebiltzarkideak: «Alderdi sektore bat baztertu da bertan. Ez da Bizkaiko zuzendaritzatik hurbil ez dagoen inor zerrendan sartu. Mesede gutxi egingen dio horrek Earen integrazio prozesuari. Bizkaiko zuzendaritzak suspentso bat izango luke edozein enpresatan». Era horretan, EAKo zerrendaburuak honako hauek izango dira datozen hauteskundeetan: Carlos Garaikoetxea Gipuzkoan, Patxi Ormazabal Araban eta Sabin Intxaurre Bizkaian. X

■ Jarraik bat egin du Gurasoen manifestazioarekin

BIHAR arratsaldeko 18:00etan Iruñean Gurasoak elkarteak deituta egingo den manifestazioarekin bat egin du Jarrai gazte erakundeak. Aski da errepresiorik ez, gure seme-alaben eskubideen alde mezua ere egingo den manifestazio horretara joateko deia zabaltu dio Jarraik Euskal Herriko gizarte osoari eta gazteriarri bereziki. «Gazteok gara errepresio militar honen aurrean lehenengo kaltetuak, atxilotuak, torturatuak, kontrolatuak... Ez dugu baina atzera egingo, orain arteko konpromezu eta dedikazio bikoitzarekin jarraituko dugu, eta bide horretan gizarte guztiaren indarra beharko dugu», azpimarratu du gazte erakundeak bere oharrean. X

■ Jesus Amantes absolbitu dute 1983an egin atentatu batetik, haren aurkako frogarik ez zela ikusita

ENTZUTEGI NAZIONALEKO Penaleko hirugarren aretoak absolbitu egin zuen herenegun Jesus Amantes 1983an Bilboko Avidesa enpresaren aurka lehergailu bat jarri egindako atentatu batetik, ekintza hartan parte hartu zuela frogaturik ez dela geratu argudiatu ostean. Jesus Amantes Frantziatik estraditatu zutenean, hilketa delituagatik estraditatu zutela esaten du Entzutegi Nazionaleko aretoak, eta fiskalak hilketa saio delituagatik eskatu zuela zigorra Amantesentzat. Ez direla bi delitu horiek frogatuta gelditu dio Entzutegi Nazionalak. Ekintza horientzatik berberengatik epaitu zuten Juan Carlos Etxeandia, hondamendi delitu batengatik zigortu baitzuten, ez hilketa saio delituagatik, fiskalak Amantesentzat eskatu bezala. Zigortua izan zen Etxeandia, Amantesen izena eman zuen lehen une batean epailearen aurrean bere laguntzaile izan zela esanez, baina epaiketan beste norbait babestearren egin zuela esan zuen. X

Presoen Euskal Herriratzea eskatzeko manifestazioa Tolosan

Hainbat udal eta erakunderen atxikimenduari egingo da bihar

Presoen kalean espero zaituzte' leloarekin, euskal presoen Euskal Herriratzea eskatzeko manifestazioa egingo da bihar Tolosa arratsaldeko 20:00etan hasita. Tolosara plataformak deitu manifestazio horrek, Tolosaldeko hainbat udal, alderdi politiko, sindikatu eta erakunderen atxikimendua jaso du. EA, HB, IU-EB eta Zutik alderdiak, esaterako, han izango dira. ELA, LAB, STEE-EILAS eta EHNE sindikatuak, Senideak, AAB eta Elkarri giza erakundeak ere bai.



Tolosara plataformako zenbait kide, biharko manifestazioaren aurkezpenaren atzetik.

ANDER GILLENDA

Enekoitz Telleria / Tolosa

TOLOSAKO Triangelu enparantzatik abiatuko da bihar arratsaldeko 20:00etan herri horretako Tolosara plataformak antolatutako manifestazioa. Presoen kalean espero zaituzte mezuarekin egingo den manifestazio horrek euskal presoen Euskal Herriratzea eskatzea du helburu, eta hainbat dira eskakizun horrekin bat egin duten udal, alderdi, sindikatu eta gizarte zein gazte erakundeak.

Tolosaldeko Alegia, Zizurkil, Ibarra, Belauntza, Lizartza, Orea, Leaburu, Hernialde, Amezketa, Irura, Anoeta, Berastegi, Ikaztegieta, Bidania, Albiztur eta Tolosako Udalek euren atxikimendua agertu dute manifestazio horrekin, eta, beste zenbait udaletan ere manifestazio horren inguruan atxikimendua agertu edo ez euren udalbatzarretan

eztabaidatzekoak direnez, litekeena da udal gehiagok erakustea atxikimendua. Tolosara plataformako ordezkariak atzo adierazi zuten, hoge inguru izan litezke azkenean biharko manifestazioan ordezkari izango duten udalak, Tolosaldeko gehienak beraz.

EA, HB, IU-EB eta Zutik alderdiak ere manifestazio horretan izango dira. Jarrai eta Gazte Abertzaleak gazte erakundeak ere euskal presoen Euskal Herriratzea eskatuko dute manifestazio horretan bihar, eta baita ELA, LAB, STEE-EILAS eta EHNE sindikatuak ere. Gizarte erakundeen artean, Senideak, AAB eta Elkarri dira Tolosara plataformak antolatutako manifestazioarekin euren atxikimendua agertu dutenak.

Tolosara plataforma • 1996ko udazkenean sortu zuten hainbat

esparrutako herritarrek Tolosara plataforma, eta makina bat ekitaldi antolatu izan dituzte geroztik *Euskal presoak Euskal Herri* eskakizuna helburu hartuta.

1995eko abenduan Tolosako Udalak plenoan hartutako erabaki bat du abiapuntu plataformak horrek. Erabaki hartan, euskal preso eta senideen giza eskubideei errespeto osoa izatea, preso guztiek zigorra jatorrian betetzea, zigorraren hiru laurdena beteta duten presoak kalera-teea eta gaixotasun sendaezinak dituztenak ere aske uztea onartzen zen, eta horiek lirake bihar egin asmo duten manifestazioaren aldarrikapen nagusiak.

Mirentxu Etxeberria Plataformako kideak eta Tolosako alkate ohiak atzo adierazi zuenez, «persona guztiak pertsona bezala tratatzea da horrekin guztiarekin eskatzen dena». X



Lan eskaintza

ARKO • Arrasate Komunikabideak

ATBko arduraduna eta teknikaria

Baldintzak:

- Euskara idatziz eta ahoz ondo menperatzea
- Ikus-entzunezko teknika-ria izatea

- Kazetaritza ezagutzea
- Kanpoko harremanetarako gaitasuna izatea
- Gida baimena eta autoa edukitzea

Curriculumak aurkezteko epea EKAINAREN 12an bukatuko da.

Curriculumak ARKOko Administrazio bulegoan jasoko dira.

Otalora Lizentziatua, 31 • 20500 ARRASATE (Gipuzkoa) - Tel.: 943 79 02 26



1. SAGARNO EGUNA

15:00...21:00
ERAKUSKETA eta BIDEOAK
Txalaparta, Trikitixa, Bertsulari,
Dantza, Txaranga...

17:30...21:00
SAGARNO DASTAKETA

21:30...1:30
DANTZALDIA
ZAPOZAIN taldearekin

* EGURALDI TXARRA EGINEZ GERO BESTA XAPITO AZPIAN AGINEN DA.

98/06/13
HENDAIA

ANTOLATZAILEA



Euskal
BALEAK Elkarte

+ 14 Hendaia elkarte eta
16 sagarnotegi